



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Bangladesh opposition lenir
Khaleda temang kanga mejungi lir

Messi-i assist 405 süja
otsü tasen yangluogo



VOL. XXIII ISSUE NO. 55 (ADOK 55) DIMAPUR TENTONÜ (MONDAY) LUCHII (DECEMBER) 01, 2025

₹ 5.00

Governor Bhalla-i Statehood Day salemabener

Dimapur, November 30, 2025 (TYO): Nagaland-i December 1 nü Statehood Day amungtsü lia Governor Ajay Kumar Bhalla-i nübortem dang yimjung, terenlok aser telongjem tenangzükba agishitsü ayongzükogo.

Sorkari terenlok, connectivity, tashishitsü maliba ketdangsübaren, aser senso ajak ajungkettsü maongkatem agüja item alizüngtem atongtsü meranger ta Governor Bhalla-iashi.

December 1, 1963 Statehood Day nungi Nagaland kanga

tejakleni aruogo. Mezüngpurtem, taintem aser lennirtem shisatsü ajanga iba state tamendakdak yangertsüogo ta pai ashi.

"Parnoki bendanga agütsüba aser akangkanga noktakba ajanga asenok maneni ajungmesor aser tarutsü tajung atema inyaker" ta Governor Bhalla-isa ashi.

"Yimjung, amalitep aser olemtep ajanga asenoki tejakleni aotsü taginüba atongtsü. Nübertemi nükjidong tajung yur tejakleni aotsü ayongzükur" ta paisa ashi.

Nagaland Congress-i MHA aitsür

Dimapur, November 30, 2025 (TYO): Hornbill Festival nung adeni arurtem asoshi Protected Area Permit (PAP) agiena atar ta Union Home Ministry (MHA)-i mapangtong nung metetdaksüba aitsür ta Nagaland Pradesh Congress Committee (NPCC)-i ashi.

Iba inyakyim ajanga Centre-i mezügmeshitsü tebilemba den yimtenren aser tamangba yimsü tsütsü telemsa ayuba sayur ta Communication Department, NPCC-i sangdong ka nung ashi.

MHA-i American evangelist Rev. Franklin Graham nembo visa magütsü saka PAP khen atema tenokdangbatem agiener ta

asüba ya meputep. Rev. Franklin nem visa magütsüba ya tamangba yimsü bendanga amshiba lir ta NPCC-isa metetdaksü.

MHA-i benjung nung adeni arurtem asoshi PAP rules agiena ataba ya security nüngdakba ka masü saka yimtenren tsütsü tajangzük angutsü atema inyakba policy ka lir ta parnokisa aitsüogo.

NDA den yariteper Nagaland sorkari mepishiaka Rev. Franklin Graham India-i marudaksüba ya Nagaland nung alirtem mezügmeshiba lir. Iba ajanga BJP sorkari Khristan tamangba yimsü sempaba sayur aser Naga nung taginüba mezügmeshir ta NPCC-isa metetdaksü.

Rev. Franklin Graham nem visa magütsüba aitsür: CPO

Dimapur, November 30, 2025 (TYO): Rev. Franklin Graham nem visa magütsüba atema mepelar aser jashir ta Chakhesang Public Organisation (CPO)-i metetdaksüogo.

India sorkari iba lemtet agiba ajanga Naga nung temulung yirutsüogo kechiyong onoki ita aika pa pelaa agizüktsü atema sarasadema aruogo ta CPO-i ashi.

Nagaland ya Khristan tamangba aser tanüla senmang atema alimai meteta lir aser pa arutsüba ya asentenshiba mapang ka asütsü ta bilema liasü. Ajisiüaka pa nem ajungbena visa magütsüba ajanga India-i putu

aika onok mezügmeshia aruba sayuogo. Naga nung putiotsü, maitsü aser külem taginübatem hao ta melii onok madak lemtet balala benoka inyaksangshia arur ta CPO-i sangdong ka nung ashi.

Naga Club-i Simon Commission dang 1929 Memorandum nung "aleml mapang ama onok sasa onok tarutsü bushia odakjang" ta asüba shin o iba tatalokba ajanga bilemtetaksür, ta CPO-isa ashi.

India sorkari timi, tashishitsü melii aser aria bilema mapatem inyaksü ayongzükur. Nübertem temulung yirutsüsa lemtettem magitsü metetdaksür tav CPO-isa ashi.

ECI-i special intensive revision mapang agütsüsemer

New Delhi, November 30, 2025 (Agencies): State aser Union Territory 12 nung voter list atema special intensive revision (SIR) inyaksü atema hopta ka agütsüsemerogo ta Election Commission-i tanü metetdaksü.

Asüng nungi Parliament winter session tenzüktsü lir aser iba mapang SIR onük atema o kanga atsütepa jembitsü ama ajiteter.

Election Commission-i Deobarnü sangdong ka agütsüba nung election ketdangsürtemi voters indang draft list adoktsü atema hopta ka agütsüsemerba shia lir. Iba atema enumeration period ji December 11 nü tembangtsü. Tesüiba nung iba atema December 4 lateta liasü.

Election Commission-isa

December 9 nü draft voter list sayatsü lateta aliba December 16 aser February 14 nü final list adoktsü metetdaksüogo.

Trinamool Congress aser tanga Opposition party balala nungi lennirtemi taoba hopta Delhi nung Chief Election Commissioner Gyanesh Kumar den ajurutepa liasü aser idangji SIR exercise mapang melenshitsü ayongzük.

EC-i SIR exercise ya tajungba inyaksü mepishia liasü. Iba mapa nung booth level officers (BLOs)-i kibong shia sema senzür aser mapang tatakzük nung kanga timtema inyaker ta opposition party temi EC dang ashi.

West Bengal, Tamil Nadu, Madhya Pradesh, aser Uttar Pradesh nung BLOs soseta asüba osangtem lir.

Tanü nungi countrypartners 6 den Hornbill Festival tenzükur



Osangbener den jembidang tangokba noksa nung angur.

Kohima, November 30, 2025 (TYO): Hombar nungi Kisama Heritage Village nung Nagaland-i anogo 10 nü Hornbill Festival tenzüktsü renemogo. Taküm benjungmung nung country partners 6 aser state partner ka lir.

Hornbill Festival ya 2000 nungi kümshia state sorkari tourism promotional sentong ka ama amunger. Iba benjung ya Nagaland asoshi sobaliba sentong tulutiba kümogo aser tourism ajungketba den külemi Naga kintem sobaliba ajungketer.

Kohima nungi kilometer 12 shi pilar NH-29, Kohima-Imphal road nung Kisama nung kin ajak adenshir iba benjung amunger.

"Nagaland Statehood Day den külemi 26 buba Hornbill Festival tenzüktsü" ta Tourism and Higher Education Minister Temjen Imna Along-i ashi.

Tanü Directorate of Tourism nung Tourism Director Viyelo Duolo den külemi osangbener senden ka nung jembidang pai iba osang metetdaksü.

Taküm country partners 6 lir aser parnokji France, Ireland, Switzerland, United Kingdom, Malta, aser Austria lir. Maneni, state partner Arunachal Pradesh

lir aser parnoki Naga nungertongti kin 18 den külemi shilem agitsü, Minister Along-i ashi.

Iba benjung ya Nagaland Governor-i partner countries teshimtet teloktem aser Arunachal Pradesh Chief Minister den külemi host asütsü.

"Nagaland kübok tesem balala nung festival extensions alitsü. Mon (Dec 8-10), Dimapur (Dec 6 nungi Hornbill Carnival), Wokha (Doyang Festival), Zünheboto, aser tanga tesemtem nung sentong balala agitsü" ta Minister Imna Along-isa metetdaksü.

"Tzünglu aruba aser lenmang raksaba ajanga maparen inyakba nung mapang agiogo, saka Tourism, Power, PHED, Police, aser district administration tem dena line departments-i kanga dang meranga maparen ajak renemogo" ta pai ashi.

Hornbill Festival mapang foreign tourists arutsü atema Protected Area Permit (PAP) procedures agiena ataba atema pelar ta Minister-isa ashi.

Nagaland Chief Minister Neiphiu Rio-i tan November ita nung anaben tashi Union Home Minister dangi Hornbill Festival asoshi PAP agientsü mepishia

shiditem züluogo.

Pakistan, Bangladesh, aser China amala restricted countries dak alaka foreign tourists ajak asoshi PAP lapoktsür, ta Minister Along-isa ashi.

Nagaland-i partner countries dang nungi education, culture, research aser skill development den tesentaktep ayuba ajanga tajangzük angur ta paisa ashi.

Japan-i JICA ajanga maparen balala inyaker aser iba nung tawa Kohima Eco Park lapokba dena lir ta paisa shisem.

"Yaküm Hornbill Festival indang official statistics ajanga unorganised sector nungi Rs 189 crore shi revenue ngutetba shia lir. Ajisiüaka shitakba nungbo senotsü iba den teimba arur alitsü aser homestays, artists, transporters o local businesses-i aika aazükogo" ta Minister Imna Along-isa ashi.

Anogo 10 nü benjungmung mnung mapa meyirjang aika adoker aser küm piyong tourism maongkatem angur, ta paisa ashi.

"Taküm benjung nung Kisama nung main venue telungi entry ticket atema nisung ka nung Rs 150 agitsü" ta Tourism Director Duolo-i ashi.

Tsüngremi temepishiba ajak bilemteter: Rev. Robert Cunville

Kohima, November 30, 2025 (TYO): "Nenok yangi odang aruba masü saka Tsüngremi nenok sarasadem angashiogo" ta Billy Graham Evangelistic Association (BGEA) nungi Rev. Robert Cunville-i ashi.

Deobarnü Indira Gandhi Stadium, Kohima nung "Nagaland United: A Gathering of Faith, Hope and Revival" nung pai iba ya ashi.

Tanü Khristan tamanger meyirjang aika stadium sünga adenshi aser tekülem, sarasadem nung shilem agia liasü.

"Kibongtem, timtem aser tejashi atema tempishiba ajak Tsüngremi angashir. Asenoki alima benjabenu agiendi aser Tanüla Temeshi ajanga Tsüngremi jembiiba ola angadi" ta Rev. Robert Cunville-i ashi.

"Alima nung ajak dang tulutiba aser putiotsü nung atalokba rongnung tongtipangtiba tatalokbaji Yisu Khrista kangki nung metaba lir.

Putiotsü nung kanga mejungi nisung tepsetbaji iba ya liasü aser Yisu-i temang nung timtem kanga angü" ta pai ashi.

"Pa mang azü agi asüng aser Khrista timtemba ajanga Isaia aikari shizüka yutsüba atalok" ta Rev. Cunville-isa ashi.

Khristan yimsü ya anüolen alir tamangba yimsü ta jembiba ya tai. Yisu ya Middle East nung aso aser iba ya alima tiyongtsü lir. Yisu yaria kangki mezüng apusangji Africa nung ka liasü aser iba ajanga tetenzüklen nungi Osangtajung nung meimchir ajak dena liasü ta Cunville-i ashi.

"Nisungtemi Yisu madak Barabbas shim aser tanü-a nisung aikati mapa, o aser tebilemba nung kasa aibelen asür. Asenoki maneni Yisu kangki nung metar. Khrista dang nungi pilaa aoba ajanga nisung aika taküm nung yimjung aser tepela mali, anungji tamangertemi kangki dangi arutsüla kechiyong iba ya yimjung, tadok agütsüba aser teti

taküm alitsü lenmang lir" ta paisa ayongzük.

Kangkidong nung auer kati Yisu dang pa yimli nung ni bilemtetang ta ashidang Yisui na kü den paradise nung alitsü ta langzü. Iba ajanga Tsüngrem indang masadangtet taochi sayur ta Rev. Cunville-isa ashi.

Iba sentong nung Secretary Social Concern, NBCC Dr Villo Nalero aser Nagaland Joint Christian Forum president Rev Dr Neikedozo Paphino natia o jembi.

Sentong nung mendenji KBPF president Rev Dr Ruokuovilie Sachü liasü, Phom Baptist Church Kohima Pastor Rev Phomlee Van-i sarasadem aser Sumi BC Pastor Khekavi K. Yeptho aser Kohima Lotha BC senior pastor Rev Dr K. Benry Lotha nati lai azüng.

UBC Kohima nung Worship Pastor Vimezo Iralu-i anir züngsem 700 shi kati akümba KBPF Combined choir-i ken aten.

ATI nung NCS (P) indang Foundation Course temogo



Dimapur, Yimpoksüi/Nov. 30 (TYO): Administrative Training Institute nung Nagaland Civil Service (Probationers) Batch of 2024 indang 1 Year Foundation Course tembangba sentong ka November 29, 2025 nü ATI, Kohima nung agia liasü.

ATI, Kohima nung December 2024 nungi NCS (P) indang Batch of 2024 indang Officers Trainees 16 tashi küm ka Foundation Course agia liasü.

Iba sentong nung Kaholi Sema, Joint Director, ATI

menden liasü aser training indang osang tongmelang ka Dr A. Alem W. Longchar, Assistant Director & Course Coordinator ajanga lemsatepa liasü.

Officer Trainees anati training nung ajangshibatam lemsatep, yangji classroom sessions, department aser organizations balala nung attachment nung aliba, Kerala, West Bengal aser Tripura-i Bharat Darshan aoba, physical fitness training amala dena liasü.

Training agirtemi bendanga

agütsür temeim nung nübur tenzüksü tejangraba lemsatepa liasü.

V. Shashank Shekhar, IAS, Director General, ATI, Additional Chief Secretary (Agriculture) and Agricultural Production Commissioner ajanga tayongzüka o jembidang Officer Trainees tem moatsü aser maneni ochi tangatetba nung meranga inyaksü ajungshia liasü.

Paisa pei temang anema alitsü nungdakba indanga shia liasü.

Northeast ajunga menoknok Zone VI küboki aiter

Guwahati, Yimpoksüi/Nov. 30 (Agencies): India indang earthquake safety rules melenshiogo aser linük tuluba, talisa Northeast ya menoknok tesashiba anoktsü atema renema alitsü.

National code tasenba IS 1893:2025 ajanga linük ya seismic zones pongu kuma lemsatsür, aser India linük shilem 61 'moderate to high earthquake risk' küboki aiter. Tetetzü India nung timba menoknok tesashi anoktsüba tesemtem nung alir.

Temelenshi tulutibaji 'top-risk category', Zone VI ya lir. Northeast ajunga iba tamajungtiba zone küboki aiter. Region nung taoba mapang menoknok anokba aser ali telung nung seismic waves arakzüba scientist temi kanga junga asadanga sülen iba zone ya lemsatsü.

Iba update tasenba ya zones tenüng melentsüba indang kising masü. Code yagi India nung engineer temi ki yanglutsüba indanga sayur. System tasenba nung advanced probabilistic methods amshir aser ibai alima tesem ajunga nung menoknok polua anokba linüktem ama tarutsü nung koba tashi sashia anokshitsü, ta asadanger.

Guidelines tasenba nung ki o jen tashi taitba aser tajungba yanglutsü atema ashir. Kisü-

jensür temi anokshiba kisüng masü saka atashiba, ali yimya aser menoknok kanga sashia anokdang ali tziü ama akumtsü indanga bilemstsüla.

Ozüng nungya kanga bulua senzuka yutsüba lendong indanga tejangja shia lir: architectural elements aser hadir shidak masüba ajanga ki o jen laoba aser ki o jen tashi ita liaka nisung yiruba.

Ozüng tasenba yagi Guwahati, Imphal, Shillong aser Aizawl ama kanga kera ainba yimitem nung timtem tulu ajurutsü ta urban planners temi ashir. Komarka asüyonga Zones III nungi VI tashinung aliba tesemtem nung ki o jen menoknok agi meraksatsüsa yanglutsü BIS ajanga tejangja shia lir.

"Northeast ajunga Zone VI nung lir asünung, region nung seismic design standards tajungba amshitsüla, detaling tajungba asütsüla aser kisü-jensüba ajunga kanga junga mitsüla," ta mongin kati ashir.

India maneni kanga kera ainer asünung, nisung aliba ki, kakat reju, offices, nüburtemi amshiba ki o jen menoknok tesashiba anokba nungi kumzüka alitsü nükjidong nung code ya yanglushi aser ibaji ajanga tarutsü nung nüburtem kumzüka alitsü.

Assam nung ochimashi mapa inyakba mechi sorkar mapa inyaker 430 puogo

Guwahati, Yimpoksüi/Nov. 30 (Agencies): Assam nung ochimashi aziökba maparen tesashiba inyaka 2019 küm nungi ochimashi mapa inyakba mechi sorkar mapa inyaker nisung 430 apuba record ajanga sayur.

Tejangja senotsü aruba nungi alia ki o jen aser rongsen bendenba mechi ketdangsür 25 tashi apuba indang documents ajanga

sayur aser parnok ajak anema ken o benokogo. Sorkar indang ozüng nung aliba ama departmental inquires tang teinyakdak lir.

Assam Police indang Vigilance and Anti-Corruption wing ajanga nisung timtiba apu, sorkar mapa inyaker 302 apu. Chief Minister's Special Vigilance Cell ajanga nisung 88 apu aser Prevention of Corruption Act kübok police

stations balala nung 40 apu. Sorkar mapa inyaker pua alir ajunga nungi parnok 23 mapa nungi anentsüogo.

Ken o timba tang tebushidak aser kata tejangja aitsüba mali. Pua aliba sorkar mapa inyaker 291 anema charge sheets benoka lir, okadak ken o maneni jembir aser establidhes procedures nung aliba ama department-i inyaker ta ashir.

Dimapur nung Territorial Army recruitment rally tembangogo



113 Infantry Battalion (Territorial Army) Rajput ajanga anogo 15 atema ayongzüka multi-state Territorial Army recruitment rally November 29, 2025 nü tembangogo.

Dimapur, Yimpoksüi/Nov. 30 (TYO): 113 Infantry Battalion (Territorial Army) Rajput ajanga state balala atema anogo 15 Territorial Army recruitment rally agiba November 29, 2025 nü tembangogo.

November 15-29, 2025 anogotem agiba rally nungya Northeast nungi states tenet den West Bengal, Sikkim aser Andaman & Nicobar Islands nungi nisung 6,000 shi shilem agia liasü.

Iba rally takok ngua agitetba ajanga 113 TA Rajput ajanga

jelia sentong tajung yanglua kanga junga ketdangsüa ochi nung iba rally ayongzüka sayur.

Iba maparen takok ngua ayongzüka nung Dimapur Civil Administration aser Police teyari tulu lir, shirnoki traffic, security aser civic facilities nung yaritupa liasü.

Rally nung candidate tem indang document reprangtsü atema Candidate Assistance Counters tem lapok, meta talang nungi arur atema special helo desks amenok, photocopy aser form angati sütsü, District

Administration den teka amteper traffic aser lokti ketdangsüba inyak.

PFT, PMT, documentation aser medical testing kanga ochishia agi, nungdakba amenities, chiyongtsü, tajemtsü tziü, anisungzükdak tesemtem agütsü aser physical test nung takok anguba candidates atema guidance booths lapoka liasü.

113 TA Rajput ajanga metokmeperi kecha madokdaksüi iba rally tulu ayongzüktetba ajanga battalion dak yimya tajung aliba aser tanishir tajung aliba sayur.

Dimapur nung Tourist Information Centre-cum-ILP Facilitation Counters lapokogo



Senior Tourist Officer's Office, Dimapur nung Tourist Information Centre-cum-ILP Facilitation Counter lapokba mapang tangokba noksa ka nung Deputy Commissioner, Dimapur, Dr. Tinojongshi Chang den ketdangsürtem angur.

Dimapur, Yimpoksüi/Nov. 30 (TYO): Tourism Department ajanga Dimapur aser Chümoukedima indang District Administration den lungjemer Senior Tourist Officer's Office, Dimapur aser Dimapur Airport nung Tourist Information Centre-cum-ILP Facilitation Counters lapokogo.

Item Centre yagi Nagaland-i aiter nem offline Tourist Inner Line Permits (ILP) agütsütsü.

Tourist Information Centre, Dimapur ya Railway Station aser Bus Stand nungi talangba mepilai lir, kong train aser gari lenmang nungi arur tourists tem yaritsü aser Tourist Information Counter, Dimapur Airport ya Dimapur Airport telung nung lir, kong tayimtsü nung arurtem yaritsü.

State semdang temi Google Maps nungia "Tourist Information Centre" nung item tesem ya jangiatetsü mesüra

+91-6909636762 ajanga tongtepratepsü akok.

Tourist Information Counters nungya offline Tourist ILPs dang agütsütsü.

Senzüsemponger temi maneni online ajanga <https://ilp.nagaland.gov.in/> nung apply sütettsü.

Dimapur nung aliba Tourist Information Centre-cum-ILP Facilitation Counter ya Deputy Commissioner, Dimapur, Dr. Tinojongshi Chang, NCS ajanga ADC, Dimapur Zakabo V Rotokha, NCS, Senior Tourist Officer, Dimapur, Keholeno Kennao aser Tourism Department nungi ketdangsürtem den külemi lapoktsü.

Dimapur Airport nung Tourist Information Counter ya Deputy Commissioner, Chumoukedima, Polan John, NCS ajanga Tourism Department nungi ketdangsürtem lia lapoktsü.



New Delhi, November 30, 2025: 'Operation Sagar Bandhu' kübok Sri Lanka nung Ditwah cyclone agi kongshiba nüburtem nem teyari balala bener otsütsü atema tayimtsü nung oset oshiketdang tangokba noksa nung angur.

Opposition-i linük security aser SIR atema jembitsü takhangba agütsü

New Delhi, Yimpoksüi/ November 30 (Agencies): Asü kwa mongpu Parliament jelia Amongnü sorkari ayongzü kba party ajak senden nung Opposition-i linük security aser SIR densema tongtibang onük aika nung o lemteptsü takhangba agütsü.

Opposition-i Parliament nung linük security aser SIR densema mopung kanga menenba, aluyimertem tebilemtsü onük, democracy wazüka ayutsü aser foreign policy onüktem nung o lemteptsü takhangba agütsü.

Parliamentary Affairs Minister Kiren Rijju leniba nung amenba senden nungji sorkar nungi Union minister tem-Rajnath Singh, Arjun Ram Meghwal aser JP Nadda nungera liasü.

Iba senden nung Opposition nungi Congress MP Jairam Ramesh, TMC MP Kalyan Banerjee, Samajwadi Party MP Ram Gopal Yadav aser AIADMK MP M Thambi Durai nungera liasü.

Kalyan Banerjee-i, opposition-i tongtibang onük aika nung o lemteptsü akhanger, ajisüaka sorkari temelaba magütsür, ta aitsü.

Paisa, linük nung SIR aser MGNREGA ama tongtibang onük aika jembitsü nüngdak, ajisüaka Parliament nung o lemteptsü atema temelaba magütsüra Opposition shilem mali, ta ashi.

Lok Sabha nung Congress party nungi deputy lenir, Gaurav Gogoi-i, party ajak senden nung onoki tongtibang onük aika metetdakja itemji Parliament nung benoka o lemteptsüla ta shiogo, ta metetdaksü.

Gogoi-isa, "Ato kilonser aser home minister na lenisüba nung sorkari India nunger democracy aser parliamentary inyakyim samatsütsü meranger ama reprangteter. Opposition-i linük security aser voters list merüktetba onüktem nung o lemtepner. Ano külen rongsenketzüng tsütsü security tebilemtsü onük lir," ta ashi.

Foreign policy dak sendakba nung Gogoi-i, "India-i tanga linüktem nung ajemdaker foreign policy renemer. Linük kari

asenok nem Russia nunger totzü malidaksüner. Ano linük kati parnok defence nung invest asür aser asenok renema mali," ta ashi.

Samajwadi Party lenir, Ram Gopal Yadav-i, "Special Intensive Revision (SIR) atema o lemteptsü memelara onoki Parliament senden mekadaksütsü. Ochimashi tulu anguba ajanga Samajwadi Party-i SIR tebilemtsü benokogo. Onoki iba indang ya tangashi dang angashia liasü, saka tangbo tenük agi angur. Bihar nung tim masüba inyakyim liasü. Onoki SIR atema o lemteptsü takhangba agütsüogo," ta metetdaksü.

Congress MP Pramod Tiwari-i, "SIR ya mapang tatsüka tsüngda state tesem ajaklen benoker, iba ya tamakoktsü. Linük yimtiba nung bomb lendong atalokogo. Ato kilonser Modi indang foreign policy tem tamakok nguogo. Iba dak alia Delhi aser tanga state tem nung mopung kanga menenba tebilemtsü onük nung o lemteptsü nüngdak. Taonung 6:00 ako nung onok senden ka amentsü aser nikongdang 4:00 ako nunga Business Advisory Committee senden amentsü. BJP tebilemba onüktemji kechisa aliar repranga atadi," ta ashi.

DMK MP Tiruchi Siva-ia, Parliament nung SIR onük nung o lemteptsü atema takhangba agütsütsü asoshi opposition party ajaki melunger, ta metetdaksü.

CPI-M MP John Brittas-i, "Delhi nung bomb lendong ajanga sorkar jungkai adoktsüogo. Onoki security dak sendakba onüktem nung o lemtepner. Parliament nung rongrong adokra ibajibo sorkari khuret asütsü," ta ashi.

Party ajak senden tembangba sülen Rijju-i, sorkari onük ajak nung o lemteptsü melunga lir, ajisüaka ajakji Parliamentary temzüng kübok asütsüla, ta ashi.

Asü kwa mongpu Parliament senden nung sorkari bill 20 shi benoktsüa akok, aser item bill rongnung Health Security & National Security Cess Bill, Manipur GST (Second Amendment) Bill, Central Excise (Amendment) Bill, Insolvency & Bankruptcy Code, Corporate Laws, National Highways Act, Arbitration and Conciliation Act, Higher Education Commission of India Bill aser Merchant shipping and port-related bills densema lir.

Asü kwa mongpu senden ya December 1 nü tenzüksü aser December 19 nü tembangtsü.

Dantewada nung Maoists 37-i surrender süogo

New Delhi, November 30 (Agencies): Chhattisgarh kübok Dantewada district nung Maoists telungpur 37 temai adoka surrender süogo; parnok rongnung tetsür 12 densema liasü.

Amongnü parnoki police aser CRPF sepaitem matsüngdang surrender süogo. Parnok 27 apuba atemabo senpet sen lakh 65 agütsütsü sangdonger liasü.

"Poona Margem" mapatong kübok parnok nem senotsü teyari agütsütsü aser loktiliba nung taküm tanaben yangershitsü atema teyari agütsütsü, ta Dantewada Superintendent of Police Gaurav Rai-i metetdaksü.

"Iba mapatong ya Bastar range police-i tenzü. Bastar region nung tesü nep alitsü, taküm akhümket alitsü aser terenlok alitsü nükjidong nung iba mapatong tenzü," ta pai ashi.

Police aser CRPF matsüngdang surrender asürtem rongnung Kumali alias Anita Mandavi, Geeta alias Lakshmi Madkam, Ranjan

alias Soma Mandavi aser Bhima alias Jahaj Kalmu nunger densema lir. Parnok nisung shia apuba atemabo senpet lakh 8 agütsütsü sangdonger liasü, ta Rai-isa metetdaksü.

Sorkar rehabilitation policy kübok parnok nisung shia nem sen 50,000 agütsüba den külemi skill development training agütsütsü aser aluyimba li asütsütsü.

Central aser state surrender & rehabilitation schemes kübok tesüiba ita 20 tsüngda iba district nung Maoists 508-i surrender süogo.

Ano külen Union Home Minister, Amit Shah-ia tanüngba Maoists telungpurtem dang rara anentsü aser tekeraba nung surrender asütsü ajungshiogo. Tesüiba ita 23 tsüngda Chhattisgarh nung Maoists 2,200 dak tali surrender süogo.

Centre sorkari sangküm March ita tashi nungbo linük nung Maoists meshimeshia samatsütsü nükjidong yur inyaker.



November 30, 2025 nü Shimla nung Himachal Pradesh Chief Minister, Sukhvinder Singh Sukhu-i Himachal Pradesh Congress Committee nung Tir tasenba, Vinay Kumar ajurudang tangokba noksa nung angur.

Cyclone Ditwah ajanga Tamil Nadu nung nisung asem süogo

Chennai, November 30 (Agencies): Cyclone Ditwah ajanga Amongnü Tamil Nadu tesem aika nung tzünglu sashia aru aser tzünglu dak sendakba lendong nung nisung asem süogo, ta Amongnü state sorkari metetdaksü.

Iba cyclone ya taruba ghonda 24 tsüngda north tsütsüleni aotsü aser Tamil Nadu den kidanger Puducherry atongtsü, ta IMD-i metetdaksü.

Amongnü Cauvery delta district tem nung tzünglu sashia aru aser tamajungtibaji Ramanathapuram aser Nagapattinam district na nung liasü.

Tzüyimkümlen aliba jilatem-Rameswaram aser Nagapattinam nunga tesem aika nung tzü metsüngogo.

Nikongdang Regional Meteorological Department-i, iba cyclone ya north tsütsüleni ghonda ka nung kilometer 7 kera odar aser tang Cuddalore nungi kilometer 100, Karaikal nungi kilometer 100, Puducherry nungi kilometer 110, Vedaraniyam nungi kilometer 140, southwest Puducherry nungi kilometer 160 aser Chennai nungi kilometer 180 pilar lir, ta metetdakja liasü.

Met Office ajanga, iba cyclone ajanga taruba ghonda

24 tsüngda Cuddalore, Nagapattinam, Mayiladuthurai, Villupuram, Chengalpattu, Pudukkottai, Thanjavur, Thiruvavarur, Ariyalur, Perambalur, Tiruchirappalli, Chennai, Kancheepuram, Tiruvallur aser Ranipet district tem; Puducherry aser Karaikal nung tzünglu sashia arutsü, ta metetdaksü.

North Coastal Tamil Nadu aser Puducherry nung mopung ghonda ka nung kilometer 60-70 nungi 80 tashi kera aontsü.

Tzüyim nunga tzüsem sashia atutsü, saka December 1 anepdang tashi nungbo süngjemtsü, ta Met Office ajanga metetdaksü.

Iba dak sendakba nung angopurtem dang tzüyimi maotsü tekümdangtsü metetdaksü.

Tamil Nadu state sorkari SDRF aser NDRF densema disaster response team 38 lemozükja lir, iba dak alia Honibar nikongdang tashi nung tanga state tem nungia team 10 yoka lir, ta State Revenue & Disaster Management Minister K K S S R Ramachandran-i metetdaksü.

Minister-i, Cyclone Ditwah ajanga tzünglu dak sendakba lendong nung nisung asem süogo, kiset shiruru 149 asü aser ali hectare 57,000 alu raksatsüogo, ta metetdaksü.



TIR YIMYIM YIMOBILEM (EDITORIAL)

DIMAPUR MONDAY, DECEMBER (LUCHII) 01, 2025

Nagaland agitsü asü magitsü ?

Nagaland nung alir Naga nung asoshi tepelatsü osang kaji, tanü mezüing December (Luchii) anogo, 2025 küm Nagaland arishi küm 63 ajunger. Ibai asenok ajak asoshi takok tuluka asütsü aser ano talisa Nagaland akümeritem asoshi tepelatiba anogo ka lir. Atangji, India kübok Nagaland-a state ka akümtsüsa India yimten lenirtem den tajak o tejak na chitepa mener ken o tamen küma jembirtem rongnung, tang taküm alirtem rongnungbo tebu tedi walunir wabong S.C.Jamir dang taküm tajung wazüka yuja lir. Aji oda, Nagaland kümer külena küm 63 tashi taküm tajung litetbaji Tsüngremer taochi ulura aser asenok ajak asoshi temoatsü ta züngshidi. Aser tanü Nagaland küm 63 ajungbamung amongdang, Nagaland akümeritem rongnung tanü asenok den taküm malirtema lir ama bilema asenoki parnok ajak nem tenüsang agütsüdi. Ashi, akok nungbo Dr.Imkongliba nungi shir parnok Nagaland akümba ken o nung meyong anemertem ajak tenüing ajenloka tesem tajung ka mesemtetnüsüka bilemer. Aji oda, parnok tenüing nung asenoki mapa tuluka meinyaktetaka, parnoki pei taküm agi tendanga Naga nung asoshi jajaba anogotem aser inyakba mapatem mamai tarutsü lanurtemia bilemtettsüsa iba ama nüngo mapa kabo inyaka toktsütsübbaji asenoki asenok sentsü amai bilemtsüla. Atangji, Naga nung asoshi India Union kübok Nagaland state akümba agi Naga yimten tebilemtsübo tatem küma melatettet, ibayongji tanü tashi, külen Nagaland state küm 63 jungaka, ano külenbo Naga yimten temeten latettsü asoshi yimjung nung Naga nung yimten nüchiso bushir teloktem den India yimteni Naga yimten ken o benoka jembidagi. Iba jagi Naga nung asoshi India telungjem kübok Nagaland state akümba yabo tatembang telemtetba ka masü saka ano Naga yimten temeten dak aketba ken o metembangteti lir ta India-ia dena hai haura akaba kuli sayur. Ajisüaka, asenok Naga nungertemi Nagaland state-a aginer aser ano Naga yimten nüchiso jenjanga aginer ta asenok yimten lenirtemi anir asenok ajak yimten nung nüktapangtar amai kümogo. Aji oda, shin nung o ashi ama, asenok ket nung akaba amtsükji chir külena machi amai asenokibo kanür, ajisüaka, kodanga yamaji mesütettsü, anungji asenoki Nagaland state dak temulung süra indangindanga Nagaland-ji asen meyong akümtsüla aser maginüra magizüktsüla aser yimten jenjang temaba ka asoshiji ayatzüra aser timtem arema nokdaktsüla. Tanü asenoki asenoksasa akoksatsüsa inyakbaji, asenoki Nagaland state ajanga bener arutsüba maongka aser temoatsü agia asenoki Naga yimten nüchiso angutsüba Naga yimten temeten indang jembir. Aji oda, asenoki Nagaland nung India temzüng kübok azüngashia election nung shilem agir aser ano külen Naga yimten nüchiso temeten indang jembir. Ibaji temangmangtsüka lir. Ano külen ashitsübo, election nung toktepertemjibo toktsür, Naga yimten nüchiso bushir telok ajaki Nagaland state election nung shilem agir. Iba jagi India den Naga yimten nüchiso angutsüba temeten indang jembibaji asenoki asenoksasa yazü kümdaytsür. Aji oda, center nung BJP teloki aniba government lira, idangji Naga yimten telatetba kati arutsü teimla nung Nagaland state election nung Naga yimten nüchiso bushirtemi dena BJP yaritsü aser ano Congress-i center nung yimsüsüba mapang süra kasa teimla nung Naga yimten nüchiso asoshi rarartermi dena Congress yaritsü ta asenoki asen tashimair tangar dang sayuba agi, tangbo tangari asenok ken o metsünga-reta magiba asenoki angur. Aji oda, Nagaland state election nunga state akümba anema jembirtemang Nagaland nung yimsüsütsü maongka angur. Ibaji tesüngmangtsüka lir. Iba tesüngmangtsü nungji tanü süngmangtepa Nagaland state akümba anogo amungdang, joko Naga nung ojang süngmangteptsüsa, Nagaland agitsü asü mesüra Nagaland melena tangang ka agitsüar, aji asenoki jangjajangjaa bendangtetsüla.

OLEMSABANG

ADVENT KHRISTMAS !!!

~ Mrs.R.Mapula,Pongen.Rtd Teacher,Merangmen Tzurangkong

Aya...jangratemtsü Khristmas ronem koda tajung

Ita ter ka ali meimchirtem taküm shia,

Anü alua memetet wadang balala nung nongzütep.

Aseni ajuruba anogo ajak to tepela mapangbo masü.

Jogo item to ama-a toker, tejaklen anogo tajung ka.

Yordan ayongküm nung nokdaker Israel purtemi,

Tenangzükbba kanan lima penzü medem,

Tamaren Chuba nungi kiler tashi, Khristmas yongyaseter.

Reprangang! Khristmas mongbo, alimai na yongyasetogo.

Arem,tenem, moaputem ajaklen,temunungratsü Khristmas ken;

Ozü sangnu, ayazüba shirurutem, par ken olajia lemlalemlar.

Meimchir ajak oli-aruli nongzüteper, yimti yimdong ajaklen.

Lajar leni maor, tang chiyongtsü makartema,

Khristmas nükla nung taka taiterten kesa yongyaseter.

Ya chichiba mezüing December anogo-ji masü no!

Tajinütsü Kodak lima den sako kongro sangpangtemi,

Yimti, yimdong ajak sentsüprang tesangwa agi yapang yanglur.

Tebang agibo koda meshitet, anüing petinu remshiba mesüka.

Tsüngrem chir nükla arur, Kodak liji-a yamaiang südiya,

Anepdang anü-i pa alidak nungi meshi-shijongi nisungtem sak-atoker.

Kinük kisang shia nungi tesüngjem Khristmas ken metangoktsür.

Sensaker, makamaiter tem-ia tepilemtsü ajak ama-a adoker.

Tsüa! Akümlirtemi nemjemseta pilemteter...

Takümtem aika tipu lima leni senjen sena ogo-ni...

Oh...tanü parnoka lilasang, koda pelala na !

Saka akümlir lima dang nungibo Kodak lima nung-jiang,

Telongsoba südi ta ozü molung anisüngzüker ati...

Haliluya ta Khristmas ken tena Yisu tsüngdang,

Kodak tenyartem den atongsema pelatepdar ta nükla arur.

Pilemdangang !! Takar,tulurtem, ya Advent Khristmas ola.

2025 küm na aser nür kibongia koma lemteter.

Na mekuta, ner yimti yimdong nung tebok tazüing aika lirko.

Par dang temeim mapa inyaksü nür kuret masü no!

Tsüngrem lartema ajiangjo...san ki dangi maruba ne santem.

Khristmas ola mangashi, amajok watidak yi ayokdak ki nung.

Itemji ne nem nongloktsüba kuret masü no!

Ne temeim nüktzü, Sarasadem parnok asoshi menüngdaklima.

Oh...meimchir ajak tia kesa masüji, temulungbo rongsar.

Saka sensakeri inyaktettsü kichia makaka.

Bethlehem nung takar sanger nashi ki,

Teshinem agi teronem menemba agi asüngba mesüka.

Lajartemia kü dak na soang ni merükteta lir ta shitetra.

Chichiba Khristmas temoatsüjibo ajiang sülang-lang.

Aseni yongyaba mezüing December ka ! onoki ayimtener.

Oh...Advent Khristmas, Yisu asoba anogo matong tashi,

Nai onok moajangma...Oh...ADVENT KHRISTMAS...

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

NCRC Prison Ministry-i Jubilee nüngtem nung district jail tem semdang



Kohima, Yimpoksüi/ November 30 (TYO): Nagaland Christian Revival Church (NCRC) Prison Ministry-i Silver Jubilee nüngtem nung Honibarnü Nagaland tesem ajaklen district jail 11 prongla semdanga Khrista osangtajung lemsatepba den külemi tepuokdak alirtem den tekülem sentong agiogo.

Kohima nunga Managing Board Chairman, Thepfuzolie R. Metha leniba nung team kati District Jail semdang aser iba sentong nungji tepuokdak alirtemia shilem tajung agi.

Metha-i Silver Jubilee

saalem osang lemsatep aser Prison Ministry tenzükba puti otsü tongmelang agi lemsatepa liasü.

2000 küm tenzükba NCRC Prison Ministry-i mezüing 2003 küm September 23 nü AIG (Prisons) Y. Yanthan nungi official süa temelaba ngua liasü.

2000 küm nungi 2010 küm tsüngda prison ministry-i tepuokdak alir nisung 42 baptitsüogo.

Kohima District Jail semdangba mapang Angami Christian Revival Church Council nung Chairman, Rev. Razouvizo Tetso-i Khrista

osangtajung lemsatep aser tepuokdak alirtem dang tim masüba lenmangtem toktsür Khrista nung taküm tasen tenzüksü ajungshia liasü.

Paisa, Khrista ajanga teimla angutsü aser taküm nung temelenshi alitsü, ta ashi.

Iba sentong tembanga District Jail chaplain-i tepela anküp o jembiba den külemi sarasadema liasü.

Prison Ministry silver jubilee nüngtem nung NCRC Prison Ministry team balala district ajak nung jail semdanga sarasadem ayongzüka tekülem agiba den külemi teyari balala agütsü.

Russia nung küm ka tsüngda Baptist Arogo aika nokdangogo

November 30, 2025: Tesüiba küm ka tsüngda Russia nung court temi Baptist Arogotem aika dang sorkar dang nungi temelaba memeshibo tekülem sentong magitsü metetdaksü, ta temeden atema inyakba telok Forum 18-i metetdaksü.

Council of Churches Baptist 10 anema police-i mita aoer aser özüing alema missionary mapa inyakra parnok anema ken o benoker. Talisa 2024 küm nungi tenzüka Arogotem nem tenokdangba balala agütsüba kanga bulua kümogo.

Tang tesüsa Krasnodar Region nung Arogo asem anema tenokdangba agütsüogo. October 13 nü court-i Timashyovsk nung Arogo dak sendakba kecha inyaksangshi masütsü tuyu, September 30 nü Armavir nung Arogotem aser September 22 nü Tuapse nung Arogo dak sendakba kecha inyaksangshi masütsü tuyu, ta Forum 18-i metetdaksü.

"Iba inyakyim ya tamajungba dang akümer," ta attorney aser meimchir temeden atema inyaker Sergey Chugunov-i metetdaksü.

June ita nung Timashyovsk nung Prosecutor's Office nungi ketdangsertemi Arogo ka nung tekülem sentong tagidak

mapang mita aoba sülen ita pezü shi lir district court kati Baptist Arogotem inyaksangshi ajak nokdang.

Tuapse nunga tamalen Rev. Anatoly Mukhi aser Arogo nung züngsemtemi özüing alema missionary mapa inyaker ta tai tonglokja ken o benok, aser tesüsa ketdangsertemi local Baptist Arogo inyaksangshi ajak nokdangogo.

Armavir nungi city court-i ken o benokeri mepishiba nung ajemdaker Arogo ka nokdang. Baptist Arogo nungji pastor, Rev. Vladimir Popov anema tamalena ken o benoka senchi aiben chiogo. 2021 küm nunga par kidang tekülem sentong ayongzüka agiba atema pa dang Rouble sen 5,000 (dollar sen 62) senchi chia liasü.

Court temi Baptist Arogotem inyaksangshi balala nokdangyonga Khristan teloktem maneni adenshia tekülem agir, ta Forum 18-i metetdaksü.

Council of Churches Baptists-ibo Russia nunger sensotemi sorkar matsüngdang register mesüaka adenshir tekülem sentong agitsü temeden lir, ta ashir. 1997 Religion Law aser Russian Constitution kübok lokti

adenshia tekülem sentong agitsüji senso ka temeden lir, ta Council of Churches Baptists-i metetdaksü.

Forum 18-i ashiba agi, Russia nung court temi Protestant teloktem anema-a inyaksüa akok.

Forum 18-isa, Krasnodar region nunga Kurganinsk Arogo densema Arogo aika nokdangogo aser ketdangsertemi Tenla ki shibangtsüogo, ajisüaka Arogo nung züngsemtem maneni kima adenshia moapu nung tekülem sentong agir, ta metetdaksü.

Taküm September 6 nü Arogo nokdangba sülen Rev. Aleksandr Chmykh-i ibaji anema ken o benok saka November 26 nü pai iba ken o nung tamakok angu.

Krasnodar region nunga December 24 nü Rodniki Church nokdanga liasü. Ibaji anema Rev. Vladimir Gordiyenko-i ken o benok saka tamakok angu.

Taküm July 24 nü Mari El Republic nung aliba Yoshkar-Ola Church nokdanga liasü, ibaji anema temepishiba ken o ka agütsü saka Supreme Court-i ken oji magizükba sülen October 23 nü iba Arogo nokdangogo.

ANOGO ABEN TSÜNGREM DEN

Tanela sempettem-Tsüngrem tenüng sangang

"Saka Tanela kasai pei mulungba agi nisung kaka nem lemsaa item ajak inyaker" 1 Kor 12: 11.

Mapa balala inyaksü asoshi Tsüngremi mapa lemsaa agütsüba kuli tejangji ibai lir. Mapa ajak adokdakji Tebu lir. Tsüngrem O-ji Tebu nungi arur. Kibuba Yisui Tsüngrem mapa atalokdaksür. Tanela Temeshi ajanga tazünger ajaki Tsüngrem O-ji amshir.


Kasa yimya nung arogo nung Tanela sempet temoatsütemjia agütsür. Item sempet adokdakji Tebu lir. "Sempet tajung ajak aser tabensa sempet temaba Tebu nungi lir." Tebuji tagütsiir. Techiri tenla agütsüba, shia aruba aser sentsüwangshi anguba ajanga lemsateptsü asoshi iba sempet angu. Tanela Temeshi-i Pai mulungba ama ibai lemsaa agütsür.

Tamanger kari Tanela Temeshi-i lemsatsüba nung temulung masür.

Parnoki pei aginüba asoshi mepishir. Kodaser temenen nisung tashi mait, shisa maka Tsüngrem chir kati pa mesüra la tanela dang nungi shisa takaba ta bilemtsü ? Shisa taka Tsüngremiasenok asoshi sentong tajung yangluba inyaksü akok. "Na akaba nung temulung süa liang."

Ne nem kechi sempet agütsü, aji meteta Pa tenzüka liang.

Nigeria nung Anglican putir, Edwin Achi tepset



November 30, 2025: Taoba amer telok jagi mezüingbo Achi ita northwest Nigeria nung prangpong amertemi Anglican putir ka puer aoba sülen ita ka shi lir pa tepsetogo.

Diocese of Kaduna-i sangdong ka ajanga, October 28 nü prangpong amer telok kati putir Venerable Edwin Achi den pa kinüngtsü aser jala nunger puer aoba sülen ita ka shi lir Achi bo tepsetogo, ta metetdaksü.

Archbishop Henry Ndakuba-i, "Onoki meima aliba özü putir ka asüba atema Arogoi mangyimer," ta metetdaksü.

Putir Achi kinüngtsü aser jala na tang tashi parnok puer aoertem ket nung lir.

Henry-i security agency tem dang tekaraba nung aibelenertem maitüsü jangjatsü aser putir kinüngtsü o jala na chiochtsü atema inyaksüla, ta takhangba agütsü.

Arogoi ashiba agi, prangpong

amer telok jagi mezüingbo Achi choktsü atema naira sen million 600 khanga liasü, ajisüaka tesülenbo naira sen million 200 tashi ajema alu.

Edwin Achi ya Ebenezer Anglican Church nung Priest-in-Charge inyaka liasü.

Tawa Nigeria tesem balala nung Khristantem puer aoba mesüra tepsetba kanga bulua ataloker. Anogo ishika tejaklen Nigeria Tir, Bola Tinubu-i linük nung 'security emergency' sangdonga özüing alema inyakba telok balala anema raratsü aser police meyirjang aika shimoktsü atema tetuyuba agütsüogo.

Iba linük nung Khristantem jenti tepsetba nung ajemdaker US Tir, Donald Trump-i iba linük ya Country of Particular Concern (CPC) ta sangdongogo, aser Nigeria sorkari Islamic telok balala menokdangtetra US sepaitem yoktsü, ta amokmerenogo.

Tir Yimyim

* Gari ka lungren nung tsükok.

1. Saku, 2. Nüji, 3. Asen, 4. Aria,
5. Amok, 6. Nükshi, 9. Amet,
10. Sama, 11. Agi, 12. Termeja,
13. Tanü, 14. Anki, 15. Saka,
16. Anga, 17. Lung.

Ajisiaka, party balala nungi MLA temi iba lemtet meypa reprangshitsü mepshiba nung ajemdaker Hokolbarnü tena anentsüba lemtet meypa agia liasü.

Honibarnü Ahmed ano anentsüba ajanga Assam Assembly Winter Session nung obang meputep adoka toktepba sayur.

Trump-i amokmerenba Venezuela-i khukhua aitsür

Caracas, Yimpoksüi/Nov. 30 (Agencies): US Tir Donald Trump-i sangdong ka nung Venezuela temeket airspace shibanger ama züngshitsüla ta ashiba atema Caracas-i ain adoka telangzüba agütsü.

Venezuela indang foreign ministry-i Trump o ya "ano alakyaia, ozüng alema aser kuli tejangja makai Venezuelan nübur anema tashiyim amshiba lir," ta ashi.

Danga linük ka indang airspace shibangtsü US dak tashi aser temelaba mali aser Venezuelan sangdong nung Trump-i "colonialist threat" agütsür ta tai tongloksü.

US-i iba tesem nung mitkar yoka lir aser temesepba mozü bena lir ta parnoki ashiba rong tem nung 21 ben maka nisung 80 dak tema tepsetogo. Parnoki kuli magütsü aser Venezuela Tir Nicolas Maduro-ibo US inyakyim ya pa atsüngdoktsü nükjidong nung lir ta ashir.

Trump-i pa indang Truth Social nung, "Airlines, Pilots, Temesepba Mozü shibelener aser Nisung Shibelener ajunga dang, VENEZUELA MEKETA ASER TEMALEN AIRSPACE SHIBANGER AMAZÜNGSHIANG," ta ashi.

Trump-i amokmeren tali agütsüba mapang US Congress nung Democrats aser Republican züngsem kari pai legislative temelaba memeshi ta jashiba lemsatep.

"Venezuela tsütsü Trump-i teshisadangba makai inyakba

ajanga America ya ano bendanger den jenjang tulu aketba rara raratsü anasai aor," ta Senate Democrats Chuck Schumer-i Deobarnü X post ka nung ashi.

"Asen constitution nung rara sangdongtsü tashi ya Congress dak dang keta lir."

Tawa tashi Trump den tesendaktep tajung alisang Republican Representative Marjorie Taylor Greene-ia "Nenshir, rara ka sangdongtsü tashi Congress dak dang keta lir," ta ashi.

Venezuela telung aser temeket nung mitkar inyaksangshi tali lir ta US Federal Aviation Administration (FAA) ajanga tekumdangtsü ashiba sülen yangji airlines tulu aikati tayimtsü soitba sülen anogo ishika lir Trump-i iba sangdong ya agütsü. Caracas-i parnok indang 'take-off' aser 'landing rights' agienja lir.

Venezuela indang foreign ministry ajanga Deobarnü sangdong ka nung "alima nung aliba nüburtem, alima nung sovereign governments aser tapet multilateral organizations dang taktsü maket iba tashiyim inyakyim mapa khenyongi magizüktsü" ajungshia liasü.

Kasa anogo Venezuela mitkar temi tzükumlen exercises agi, aser state TV nunga anti-aircraft nok-nü aser danga artillery senzüba sayu.

US-i Venezuela maktettsüsa meta nung alima nung aircraft carrier tulutiba,

USS General Ford aser sepai 15,000 shi yoka lir.

Parnoki iba ya temesepba mozü shibelenba azüoktsü asoshi lir ta ashir, koba 1989 küm Panama amaktsü asoshi yokba sülen region nung US-i sepai yokba tulutiba alitsü.

Brehostibarnü Trump-isa Venezuela nungeri ali ajanga temesepba mozü shibelenba US-i anendaktsütsü merangba yakta tenzüksü ta shia liasü.

Left-wing Maduro atsüngdoktsü US nükjidong lir ta Venezuela sorkari amanger, shiba taoba küm election nung tanaben shimba ya Venezuelan opposition aser danga linük aikati magizüker.

Colombia nung külem left-wing Tir Gustavo Petro-ia Latin America amokbangtsü US-i tashiyim amshir ama amanger ta ashi, saka region nung danga linük lenirtemi Trump tangatetba pela agizüker. Petro nem US-i tenokdangba balala agüja lir.

US-isa Cartel de los Soles mesüra Cartel of the Suns ya foreign terrorist organization ta sangdonga lir, kong Maduro tekolakba lir ta tai tongloksür.

Lokti tentet ka nem kiralongrar telok ta nüngja agütsüba ajanga US ozüng amshirtem aser military agencies temi tenük yoktsü aser raksatsütsü asoshi tashi tuluba agütsür.

Venezuela indang foreign ministry-i iba nüngja agütsüba khenyongi magizüker.

Sri Lanka tzümetsüng lendong nung asür 200 tajunger dang lir



Colombo, Yimpoksüi/November 30 (Agencies): Sri Lanka nung yipru tesashi ka aruba sülen tzümetsüng lendong nung asür nisung 193 jungogo, ta ketdangsürtemi metetdaktsü.

Cyclone Ditwah agi bener arutsüba tzünglu ya ano taruba anogo ishika tsüngda maneni arutsü imlar, ta Disaster Management Centre (DMC)-i Deobarnü ashiba den, nisung 220 dak tema samar bushidar ta shisem.

Sri Lanka indang Daily

Mirror publication sangdong ka ajanga Deobarnü ashiba agi, samar bushirtem rongnung Navy personnel pongu densema lir, shirnok Chalai Lagoon nung tatemsa Naval sub-station kati tzü aitba nokdangtsü merangba mapang nguogo.

Tzümetsüng aser anentsüh ajanga linük kübok tesem balala nung ki 15,000 shi raksatsüogo aser iba ajanga nisung 44,000 sorkari khen atema tejenokdak yanglur aliba nung jenoka atatsüsa kümogo,

ta DMC-i ashi.

Al Jazeera osangbener Minelle Fernandez-i Sammanthurai nungi ashiba agi, yipru agi kongshiba sülen teraksatsüba balala adokdaktsüba achayangtsü atema linük timtem nung lir.

"Tesem karbo ali agi ajunga mubanger lir. Communication raksaogo aser tesem kar nungibo tang tashi osang yoka mali," ta lai ashi.

Tanga tesemtem nung tzünglu kanga aruba ajanga tsük tema aliba ajak metsüngogo, ta Fernandez-i shisem.

Colombo north lena tzümetsüng agi tesem balala kongshir lir, kechiyong Kelani ayong nung tzü maneni metsüngdar, ta DMC-i ashi.

"Yipru aitbabo anenogo, saka ayongbanglen tzünglu kanga aruba ajanga lenden nung Kelani ayongküm nung aliba tesemtem metsüngdar," ta DMC ketdangsür kati ashi.

Tir Anura Kumara Dissanayake-i Honibarnü state of emergency ka sangdongogo aser alima kintem dang teyari meshia liasü.

TEPELABA LEMSATEPER

Onoki teti dang meima aliba kinungbo aser tsürabur **Takosashi Pongen** (Longmisa) Tsüngremi arishi talangka taküm tajung nung yutsür 24/11/25 anogo ajungbena dang iba alima nungi pilar asü maparen balala nung ozü kibong rongjena metoktsüi yimden, arogo, lokti balala aser kija kibong kwikatii ana aser talang nungi aruagi ozü kibong den nubo, rongsen, shisatsü aser sarasadem agi lepkhumong mapang yaritepogo, nenok ajak dangi tsungdong aruagi meshitetaka kanga dang pelaba lemsateper. Temoatsü agütsüsang Tsüngrem shiba kotak nung lir, pai nenok ajak azükarua moajangma ta ozü kibongi sarasademtsür.



Temeim Kinüngtsü,
Chirnur, Anükapang aser Semchirtem.

Bangladesh opposition lenir Khaleda temang kanga mejungi lir



Dhaka, Yimpoksüi/November 30 (Agencies): Bangladesh indang taoba Ato Kilonser aser opposition lenir Khaleda Zia Dhaka hospital nung temang kanga mejungi lir, ta lar party-i Deobarnü metetdaktsü.

Lar jabaso aser party tekolakba Tarique Rahman shiba tang linük nungi mintoker lir, pa kodang meyipa arutsü mejangja ta ashiba mapang ka nung Khaleda temang tamajungba küma odar.

Arishi küm 80 tain Khaleda ya November 23 nü teku nung infection ka ajanga la indang temulungjang aser tepokpok dak kongshiba sülen nija mozüki kati bener ao, ta doctor tem aser Bangladesh Nationalist Party ketdangsür tejentemi ashi.

Taoba küm kaketshirtemi anir longkak aitba mapang Bangladesh nung PM mapang talangtiba inyakla Sheikh Hasina atsüngtokba sülen lar political party jenjang junga küma aoba mapang ka nung tang Khaleda temang kanga mejungi kümogo.

Rahman shiba 2008 küm nungi London nung alir, pai Honibarnü Facebook ajanga ashiba agi, pa Bangladesh-i meyipa arutsüji pa kabuma nung mali. Iba ajanga pa yimden yimsüsüba tsütsü mesüra temzüng ozüng dak sendakba nung tetsükdaktsü

alitsü ta bilemer.

Iba sülen ghonda ishika dang lir Muhammad Yunus-i aniba interim sorkari ashiba agi, pa linüki meyipa arutsü atema parnoki kecha tenokdangba agüja mali aser maitsür ta shiogo.

"Ken o dak sendakba nung tetsükdaktsü kecha mali," ta Yunus indang press secretary Shafiqul Alam-i Facebook post ka ajanga metetdaktsü.


Khaleda temang kanga mejungi akümba ajanga Bangladesh Nationalist Party yongtsü nung ken o mejangjai kümogo, kechiyong Khaleda temang majungba den acting mendenbuba bendanglenang oa lir.

Nationalist Party-i 2014 aser 2024 küm mepetmesü aliba election nung shilem magi, saka August ita nungi parnok jenjang jung kümogo aser Bangladesh nung yimden yimsüsüba meleshia aoba mapang parnok ya tongpu apur asütsü ta amanger.

Zia shibai Ato Kilonser mapa term asem tashi benogo, la 2018 küm taoba PM Sheikh Hasina-i aniba sorkari ochi mashi ken o nung aija tepuokdaki yoka liasü aser la temang anepalutsü atema bendangleni aotsü temelaba magütsü.

Taoba küm Hasina atsüngtokba sülen mapang tatsüka dang lir la chioka liasü.

LKM-i Open Penalty Shootout aser Night Carnival sentong ayongzük



Dimapur , November 30 (TYO) : LKM Sports Excellency Award atema ayungba Open Penalty Shootout takokma nung Total Prize Pool Rs. 1,55,000 takoker nem agüja 29th Nov. 2025 anogo tempangogo. Aser ano nüburttem ajak aser Administration teyaritep nung Night Carnival dena keja timtem makai takok ngua tempangogo.

Penalty shootout sentong akhümtong Wb. I. Sentinuklu Jamir, Councillor Dimapur Municipal Council ajanga iba sentong lapokja liasü. Iba mapang pai lanur asayartem ajemaluba yimya nung asayatsü ajungshi aser Naga nung dak tangar meneppa sayatettsü senpet tajung lir saka Sports Infrastructure tajung maliba ajanga nükjidong metongtetter aser tarutsü nung asayartem nükjidong tongtettsü

atema Sorkar ajanga item infrastructure yanglutsü teyimla lir ta ashi.

Sb. Imtinuklu Jamir, LKM Sports Secretary ajanga LKM Sports Excellency Award nükjidong lemsatop aser LKM Tournament koba Langpangkong Tzukong Mungdang(LTM) ajanga 1940 kum pangzünga asaya aru aser Langpangkong Kaketshir Mungdang nem1951 kum bendanga agüja tenzüka Kaketshirtemi ajiayanga aruba den külemi iba Tournament ajanga Tzükongsanger Lungjema aruba lemsatop aser pai sa iba telungjem mapa tajung wazüka ayutsü asoshi LKM Sports Excellency Award ya mapa tasen ka inyaktetta ayur ta shia liasü. Iba Award ya state, national aser international level nung takok tulu ngur ajungshia aser tali ajungshitsu asoshi ta lemsatop.

Penalty Shootout tetoktepba nung 6 Brothers ajanga temaba jenjang ngua liasü, RM Boys ajanga Tannabuba jenjang angu aser Sb. Akulu ajanga Best Goalkeeper jenjang ngutet.

Night Carnival iba kesa nükjidong atema ayungba anogo terok nü tashi keja timtem makai amungba den nüburttem jenti arua puteppa pelateppa amungba ajanga nüburttem telungjem nung tali tashi aitba angur.

Sentong ajak nung shilem agirtem, yariteppertem, lenirtem, tetenlartem aser nüburttem shirnokisa arua yariteppa shilem agia tebur junga tembangba asoshi LKM ajanga kangasa pelar aser ano LKM ajanga tarutsü nunga asayartem atema sapang tajung jenjang ajungkettsü aser yangertettsütsü asoshi arkodong süa inyakttsü bilema sarasadema atar.

Abhishek-i ball 58 nung run 148 yanglua T20 otsü tasen yangluogo

Yimpoksüi/November 30, 2025 (Agencies): India nung opener Abhishek Sharma-i Syed Mushtaq Ali Trophy nung Punjab nungi Deobarnü Bengal den asayaba mapang ball 52 nung run 148 yanglua Punjab team-i over 20 nung asayar 5 out sür run 310 yangluba nung teyari tulu agüja liasü.

Abhishek-i ball 12 nung dang half-century yanglua, tebur T20 asaya nung run 50 takaratiba yangluba asayar tasembuba aser India nung rongnung tanabuba kumogo.

Pai ball 12 nung four pongu aser six pongu azük aser ball ka nung dang run meyangluteti iba alizüing tongteta liasü.

Arishi kum 25 tain asayar ya T20 cricket nung ball 12 nung half century yangluba asayar pongububa kumogo. Pa indang mentor aser taoba mapang allrounder Yuvraj Singh ya ball

12 nung half century yangluba mezüingbuba asayar liasü. Pai 2007 T20 World Cup nung England den asayaba mapang iba alizüing tongtet. Iba asaya nung pai Stuart Broad indang over ka nung six trok züka liasü.

Abhishek-i maneni kanga junga asaya-a ball 32 nung dang century yanglu. Pai six 11 aser four tenet züka liasü. Iba ya India nung asayar kati T20 century takaratiba yangluba tasembuba lir. Paisa, ball 28 nung century yanglua India nung rongnungi T20 century takaratiba yangluba tanabuba asayar kümer liasü.

Asaya nung Prabhsimran Singh-ia ball 35 nung run 70 yanglu. Punjab-i run 350 yangluba ya Syed Mushtaq Ali Trophy nung run timtiba yangluba rongnung tanabuba lir. Baroda-i run 349 yanglua parnoki run timba yanglur lir.

Hardik Pandya Baroda nungi SMAT asayatsü



New Delhi, Yimpoksüi/November 30 (Agencies): Return to Play (RTP) temelaba anguba sülen India nung all-rounder Hardik Pandya, November 29 nü BCCI Centre of Excellence (CoE) toktsüogo.

Pa Bengaluru nung iba facility nung anogo 42 munga liasü. Arishi kum 32 tain asayar ya Hyderabad nung Syed Mushtaq Ali Trophy nung Krunal Pandya-i aniba Baroda team nung adentsü aser December 2, 4 aser 6 nü ta asaya asem nung shilem agitsü.

Hardik ya October 14 nü CoE-i ai. Pa quadricep tabelen yiruba anepalutsü atema CoE-i ao aser taruba asayamungtem atema renema atatsü asoshi tanen makai training agia aruogo. Diwali mapang pa mapang tatsüka anisüngzük, saka specialist tem tawabangba kübok anogo 42 training agiogo.

November 30 nü nungi tenzüka South Africa den ODI

asayatsü aliba atema renemer atatsü asoshi Hardik sentong liasü, saka ketdangsürtemi pa T20 asayamung nungia tenzüka asaya nung ajungtsü ta bilema liasü.

Pandya ya takum September ita Asia Cup nung Sri Lanka den asayaba sülen khen danga asaya mali aser pa Australia den asayamung nung masayatet aser South Africa den asayatsü aliba ODI nunga masayatettsü.

Pa ya white-ball asaya nung tongtibang asayar ka lir aser team achaayangertemi pa taruba kum T20 World Cup atema renemer lidaktsüner. Baroda team nungi asaya asem asayaba ajanga South Africa den masaya tsüngda pa nem asayatsü asoshi maongka agütsütsü.

South Africa den T20 asaya mezüingbuba Cuttack nung December 9 nü asayatsü aser tatembangbuba Ahmedabad nung December 19 nü asayatsü.

Messi-i assist 405 süja otsü tasen yangluogo



Yimpoksüi/November 30, 2025 (Agencies): Honibarnü Inter Miami puri goal 5-1 agi New York City FC akokba asaya nung Lionel Messi-i alizüing tasen ka tongtetogo, koba ajatettsü asoshi mapang talangka agitsü.

Eastern Conference final nung ya Messi-i goal ka danga midaktsü saka pa indang career nung assist 405buba sütsü, koba puti otsü nung football asayar kati assist timba sütsüba asütsü.

Chase Stadium nung iba asaya akokba sülen Inter Miami ya Eastern Conference champions kumogo aser tang

mezüingbuba MLS Cup atema qualify süogo. Iba asayamung akokba densema parnoki asayamung tongtibang asem kokogo.

Asaya nung ajak dang nungi Tadeo Allende-i tajungba asaya-a pai goal asem idaktsü aser Icon of the Match narokum agizüka liasü. Maneni Mateo Silveti aser Telasco Segovia natia goal kaka idakja liasü.

Inter Miami atema mezüingbuba goal ya Allende-i minute 14buba nung idaktsü. Iba sülen minute ter tsüngda Allende-isa tanabuba goal idakja liasü. Ajisüaka NYCFC nungi

asayar Justin Haak-i minute 37buba nung par team atema goal ka idaktsüba sülen parnok nem timla agüja liasü.

Asaya tanabuba shilem nung New York puri tanabuba goal idaktsütsü atema meranga asaya saka minute 66buba nung Julián Fernández-i metsüba ball ka Rocco Ríos Novo-i kanga junga nokdanga liasü. Iba sülen mapang tatsüka dang lir Miami atema Silveti-i tasembuba goal idaktsü. Asaya nungsa minute 83buba nung Segovia-i goal pezübuba idaktsü aser asaya tatemtsü lia Allende-i team atema goal pongbuba aser pa atema goal asem buba idakja Miami puri asaya goal 5-1 agi koka liasü.

Iba asaya nung goal pongu idaktsüba sülen Inter Miami puri 2025 kum regular-season aser postseason fixtures nung goal 98 idaktsüogo, koba MLS season ka nung goal timtiba idaktsüba asütsü. Parnok December ita Vancouver Whitecaps mesüra San Diego FC den MLS Cup final asayatsü. Iba asaya ya Miami pur asoshi asaya 58buba asütsü, koba season ka nung MLS club kati asaya timtiba asayaba asütsü.

BILEMDANGANG

"Yimya ajungba agi nisung ka tepuatsüka kümdaktsür."